


Juez ta haya cu a bay demasiado leu

Partidonan den "Dream" mester reuni pa eligi un manager nobo




ORANJESTAD(AAN) -- Ayer mainta Corte den Promer Instancia a trata e caso sumario cu un grupo di persona cu ta fundadornan di e banda "Dream" a cuminsa

contra un otro fundador y su yiu.

Den sala di Corte tabata presente abogadonan mr. N. Croes, mr. Yarzagaray kendenan a representá sra. G.C. y abogado mr. Marchena a representa R.D., D.A.

Den tribuna por a mira dos grupo dividi esta e grupo cu ta sostene G.C. y e grupo cu ta sostene R.D. y D.A.

Ta asina cu R.D. y D.A. a cuminsa un caso sumario contra G.C. caminda nan ta



haya cu sin autorizacion di e mayoria, G.C. a bay inscribi e banda "Dream" na Camara di Comercio y awor ta pretende cu e ta e doño. Nan ta demanda pa Juez ordena G.C. pa hala e inscripcion na Camara di Comercio aden.

Di parti di R.D. y D.A. a bay inscribi e nomber Dream na propiedadnan intelectual pa asina G.C. no por usa e nomber.

ACUSACIONNAN SERIO
Durante tratamento di e caso por a scucha acusacionnan serio di ambos banda. Abogado mr. Marchena a señalá cu ilegalmente o sea sin notifica R.D. y D.A. y otro musiconan, G.C. a yama un reunion na Maart 2002 y a retira R.D. como manager y a nombra su mes. Segun mr. Marchena, G.C. a comete hechonan castigable ya cu el a pone firma falso di musiconan pa pretende cu nan tabata presente cual no tabata e caso. Tambe el a señalá cu ora e mayoria musiconan, pa medio di un carta a halta G.C. su atencion, nan a worde suspendi tambe.

Abogado mr. Croes a señalá cu den un forma democratico R.D. a worde baha como manager. El a trece padilanti cu R.D. ta un empleado di gobierno y ta gana placa tambe cu e banda. Tambe el a señalá cu R.D. lo a malversa 10 mil florin cu a worde duna como donacion na "Dream". Segun mr. Croes diferente biaha a pidi R.D. pa duna cuenta di e placa aki pero te ainda nada.

JUEZ A INTERMEDIA

Despues cu e abogadonan a trece nan punto di bista padilanti, Juez mr. Mulder a remarca cu aki ta trata di un problema cu ta data di 2001 y cu e no ta mira motibo di urgencia den esaki.

Juez a hala tanto G.C. como R.D. y D.A. nan atencion cu loke nan a haci no ta corecto.

El a cuminsa na bisa cu "Dream" ta un fundacion y ningun momento G.C. por bay Camara di Comercio bay inscribi e banda y pretende cu e ta doño. Den e mesun rosea el a mostra cu R.D. y D.A. no por bay registra nomber di e banda si nan no ta esnan cu a inventa e nomber. El a mostra bon cla cu ningun hende ta doño di Dream.

PROPOSICION

Juez mr. Mulder a puntra, pakico e partidonan no ta sinta na mesa manera hendenan grandi y den un reunion dicidi kico ta e destino di e banda. Den un reunion lo por dicidi kende lo bira e manager. E ta haya cu ta e musiconan di e banda mester dicidi den un reunion, kende nan kier como manager. E candidatonan mester atene nan mes na e decision di e musiconan. El a propone pa yama un reunion y e abogadonan a bay reuni cu nan cliente pa laga Juez sa.

A bin un sorto di discusion cu no tabata al caso e momento ey y Juez a bisa cu e mihor forma ta cu ta tene un reunion caminda tur esnan cu tabata y ta forma parti di "Dream" promer cu 11 di Maart 2003 lo mester ta presente pa vota.

ENVOLVE ASOMA

Juez a haya e proposicion di abogado mr. Marchena na su lugar esta pa laga miembro(nan) di ASOMA yuda den e asunto aki. Despues di bastante dialogo a keda dicidi cu dentro di dos siman e partidonan di Dream mester reuni pa asina eligi un manager. Pa loke ta trata e caso sumario, esaki lo keda wanta pendiente e resultado di e reunion.

Ta di spera cu e reunion aki lo por trece un solucion den Dream ya cu esnan cu ta sali perhudica ta e musiconan cu tin gana di toca, especialmente den e temporada di carnaval aki.